



Regd./No.19134/88 <http://www.kbc.org.in> NAI/220/99
No-G-4/Regd./Magazine/KBCThuso/MNP-61

KBC THUSO

Kum 54 Ihinna

Lhakao/March 2017

So 455

HOUBUNG THAH KILALUT
SL. ZOUGAM BAPTIST CHURCH GAMBIH 20.
General Secretary pun aga lalut tai.
19th February, 2017



EVENTS
MTC DAY
02

PALM SUNDAY-09
GOOD FRIDAY-14
EASTER SUNDAY-16



MEITHAI TE NIKHO-23

"Kapa theng, eini pumkhat lhi bang a amaho jong
pumkhat ahitheina ding un, Nangman amahohi hong in"

John. 17:11



Matijang Baptist Church, KBC 8 Silver Jubilee 23 Feb. 2017



Head office
opp. DM College
Imphal



www.kbc.org.in



kbcindia@gmail.com
mail@kbc.org.in



**United Christian Prayer for India tohgonna nolja
achesa nisl'm 21-25 sunga Hyderabad mun'a
National Conference**



**24 Feb 2017 ni a Hyderabad Paradise Hotel
mun a Bishop Paothang le Pastor Lettinlal Misao
Pastor KWS Hyderabad in Men Secretary pu leh
Youth Secretary pu ankong asokhom pl na**

CONTENTS

THUMAKAI HO

1. Editorial/ <i>Na lungsung lengpa chu koi ham?</i>	1
2. Thil kidang / <i>Rev. Lamkeng Lhouvum</i>	4
3. Theology/ <i>Rev. Silas Boipu</i>	7
4. Pathen lungdei lam/ <i>Rev. Kamboi Chongloi</i>	12
5. Vision/ <i>Rev. Onthang Haokip</i>	14
7. Mission Column	18
8. Men Column	22
9. Women Column	23
12. Youth Column	26
13. Report/Hetsah	27-31

EDITORIAL BOARD

Chairman	: Rev. Dr. HawIngam Haokip, President KBC
Editor	: Rev. Ngamjapao Haokip, General Secretary
Joint Editor	: Rev. Silas Jangminlen Haokip
Contributing Editors	: 1. Rev. Letpu Kipgen
	2. Rev. Henjalen Dounel
	3. Rev. Onthang Haokip
	4. Rev. Kaikhokam Chongloi
	5. Pastor Paokhohao Haokip
	6. Pastor Satminlen Khongsai
Cir. Manager	: Ms. Lhingjanem Haokip
Design & Layout	: Hemkholen Haokip

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 9612817768 Contact thei.
Circulation to kisai lam Mobile No. 9862633173 bol ding.



“NA LUNG SUNG LENGPA CHU KOI HAM?”

Editorial

(Text.Ex.5:15; Mtt.14:1-12; Lk.23:3;)

Thumakai :

Pathen lungset jallin 2017 kumsunga dinga Lhathum channa Lhakao (March) lha damsel'a ipuilut'uva Pakai Pathen chu thangvah le vah-choijin um jing taken. Chule tunia KBC, Thuso regular tah'a la'a (subscribed) lunglut tah'a simho jouse chung a kipathu sangtah in kahin phongin chule Thuso jong aphaat cha a ahung kiso jom jing thei na dingin natao nao ka hin ngaicha jing in ahi. Tunia chomcha Editorial column ma kahin tahlang nom chu ahileh chung a Thupi : “Nalung sung Lengpa chu koiham” kiti hi ahi. Tulai hin mihem tehohi athunei ding leh avaihom ding ki-chuna in kitha kimat kitihin gamsung asuboi ma2 jeng tan ahi. Achutile Leng kitiho hin thuneina na-satah aneijun, amaho thunei nanoija hin mihem tamtah aum in ahi. Hiche banga chu tunia nang le kei lungsung Lengpa chu koi ihsah or ipansah em ti kikhoh ngai kasan ahi. Leng umdan phabep ana veu hiute.

1. Pharaoh Lengpa : Hiche Lengpa thunei dan leh vaihop dan chu Bible thuhil'a konin ihesoh keijun ahi. Egypt gam'a Leng vaipo Pharaoh vin Israelte chung'a athuneina apohdoh a konna ichan geija Israelten genthei hesoh athoh uvem ti iheuvin ahi. Pathen miteni Mose le Aaron thusei jeng jong ijasep lou, Pathen na konna thil kidang chi som jong chu chi ko chan thikidang amitmu tah'a abol lhon vangin alungthim akikhel deh pon ahi. Aman Israelte thu apen, masanga banga changpol nakipe (supply) talou diu, nangma hon nakihol tho diu, ahivanga na cheh lhang den u chu kem deh lou ding ahi tin nasatah in engbol na ana peuvin ahi. Athunei dan leh athahat dan chu koiman ima alothei pon ahi.

2. Herod Lengpa : Amahi Huhhingpu Jesu khanglaija ana kihe Leng gilou khat ahi ti ihecheh un ahi. Amahi thanei ding dei mi, mijouse sanga let ding dei mi chule mi gimo hat, mi lungthim phalou aji achate jeng jong ngailulou, athikon minute 15 aum jeng in jong achapa ama khel ding pa jong chu ana that man in ahi akitin ahi. Hichen geija thanei le thil bol thei mi khat chu ahin, ama jeh in mihem tamtah in hinkho achan lo in, Jesu jeng jong ana munom pon, hijeha chu Juda Iscariot lungthim phalou chu aman jong ana jop'a chonset na nei lou Jesu Christa jeng jong chu thingpel a kkeh beh dinga ana peh doh jeng ahi.

3. Leng Jesu Christa : Mathew sung ivet leh Jesu lhep patep a aum laijin Aman thaneina sangin ngailutna ana kilhan in ahi. Mihemte hon Pathen hi thanei bouva ihet'u ahin, ahinla Jesu'a kimudoh Pathen anahina pa hi genthei

Pathen, Kineosah Pathen chule ngailut Pathen joh ahi ti imu'vin ahi. Ajeh chu aman aseijuiho chu akeng'u ana silpeh in ahi (John.13: 4-15). Chapang neo cha bangin hinkho ana mangin, Cross chung geijin kineosah tahn thun ana nung in thingpel'a khai-sangin ana um tan ahi, (Mtt.18:2-4). Alet nom ho chu adang ho lhacha a pang ding ahitin ana seijin ahi (Mtt.20:25-28).

4. Jesu hi dan thah pe Lengpa chu ahi. Dan kiti hi khat le khat kihak a kihet them tona dinga kistem ahin, chule kihet them tona a khat le khat chu kikan gahna ahi kit in ahi. Mihem le Pathen kitimat na jong ahi (Covenant). Pathen mingailut na le lungset muna thei lampi jong ahi, hijeha chu Jesun danthu chu asumanga hung kahipon, asubulhit joh a hung kahi atin ahi. Tulaija Houbung kivaihom na a jong koi tobang Pathen thu toh kitoh louva hung chon aum leh Houbung in dan kipohsah a nosoh a kikoiji ahi, hichun avetsah chu achonkhel pa/ nu chu kistem phat na dinga kibol ahi.

Achaina : Mihem tehi "kivaihomna" / "kivaipohna" noija umsoh kei ihu ahin, hichu gamsunga thunei vaihom ho chu ahiuve. Tunia agom lam'a sei dinga chu "Leng" kiti chu Dan chu ahi. Nangman nalung sunga nagin pen leh na ja pen chu koiham? Leiset nopsahna ham or Christa ngailutna joh ham ti chu nang le ken tunia katahsa chung leh kalung thim pumpia kakipui sah dinga chu kaki lhan ding tina ahi. Leng Pharaoh ham, Leng Heroh ham chule Leng Jesu ham tunin nangman kilhan jengin sopi, Christan nang le kei tunia vannoiya vah banga miho lah'a vah dinga inganseu ahin, alang khatna Chi banga el dinga idei'u ahi. Hijeh chun koima maipha velouvin Christa jeng ve in hinkho mang'u hiutin, chule kalsong'u hiute sopite ho. Pathen in lunglut tah'a anasim ho jousea dingin Ama Christa a Lengpa a kisan cheh dingin phat thei iboh peh taohen, Amen.

Pathen in Aman chah mite a kon'in Thil Kidang aboldoh jie.

REV. LAMKENG LHOUVUM

Jesun "Miho chu tousah-un" ati. Hikom'a chu hamhing tamtah um ahi, chuin mi sang nga jen chu atoutaovin ahi. Chuin Jesun changlhah alan Pathen alhaiyin atou ho chu ahoppheh in chule agochan nga jong chu apei. (John 6:10-11).

Thumakai:

Pathen in thil kidang aboldoh nom teng leh Ama mite,ama tahsan te a kon'in thilkidnag ho aboldoh jin ahi.Hiche Bible chang'a hi Pa-kai Jesun changlhah pheng nga(5) leh Nga ni(2) a kon'a mi 5000 avah va thusim imuvin ahi.Israel ten gamthip'a Manna aneh u chun lungsetna na chu anengelin (Lhingset) aume atiuve.Hiche a thilsoh hi Goapel jousen asun cheh un,mun nia Nellei (sand) lah a atin mun nia hampa lah ahi ati.Ipi chu hileh thilsoh hi gamthip'anoiya Israel lah'a thilsoh ho toh akilouvin ahi. Hiche Bible chang'a kon'in point 6 tobang study inei diu kadei jin ahi.

1.PaKai Jesu hin ahithe i lou ding thil athumin ahi.Vs 5

"Mipi atam'a tam amun hiche ho neh ding changlhah hoiya ichoh diu ham"?John hin aphot aseipon ahin mun dang'a

ivetleh Nilhah ahi atin ahi.Philip kom'a chun hiche ho neh ding hoiya choh ding ham tia adoh hi thil hithei lou ding khat kidong ahi.Tunia jong Pakai jin eiho kom'a ase i ho hahsa isah

diu tamtah umding ahi. Kath-eptan atohpoi, lekha them lou kahi, midang khat hileh phante ti ho akiseijin ahi. Philip chun adonbutin hahsa asan ahi. Pathen nin ei ho a kon'a angai-chat/eidoh jiu ho hi mihem'a dia hithei lou tampi aumjin ahi. Hinhlah het ding'a pha chu Pathen in hitobang patep namun'a eikoi hi kachung'a thil gonkhat anei hinte ti het angaije.

Pastor khat hi nikhat 2004 Christmas jingkah in Kolkata a aum lai tah in mikhat in kot ahin keuvin ahon leh amapa chun Rs.2.lakhs gift a ahungpen amachu koima dang ahipon Burma gam'a kivei mi khatbou ahi. Pathenin amaloupi na phondoh nadin mihao ho keuseh amangpon ginchat um lou mivaicha leh hetna nei lou ho amang chajin ahi.

2. Pathen in itahsan nao avelvelling apatep jin ahi. Vs 6.

"Hichu aman apatepna ati ahi bouve". Hiche mun'a hi Philip chu apatep ahi. Tunia eihon jong Tahsan'a na itoh u hinam? Tulai Pathen thusei hon aseinom khat chu "Nataona chu itobang'a len ham"? Mi abang khat ama ding kham'a bou taona nei, midang ding 'a tao nom lou tampi aki-ume. Sehcha a chem akisuh

hem bangin, Pathen'in lamkai ho asuhem nomin ahi. Mi abang khat tahsa a jong imacha nei lou tampi aumin ahi. Itahsan nao alet lou leh taona len jong aki-nei theipoi. Pathen itahsan nao hi Pathen Size (Pathen deibang) ahi angaije.

3. Lhaget a lodohman jat: (8th Months wages) Vs 7

Philip chun "Themcha khat cheng'a chang ding hi jong leo Denari jani in toh ponte". Denari jani chu mikhat in lha get sung'a alodoh jat nu ahi. Mihem ho hi aphot jousea aman ijat ham tin aki lung kham jin ahi. Ngaito ding'a mi 5000 chu gel leo hen ama a kon'a apoh doh ding /angaito ding hileh thil chu ahitheidi ding lim hilou ahi. Mi 5000 vahva nading chu apetna ding'a thil hahsa tah ahi. Sum chu hoija kon'a hung umdoh ding ham? Pathen in eiseipeh nom chu America ho keoseh chu vet ding hilouvin Pathen joh chu ivet diu ahi.

4. Andrew chun chapang khat ahin mudohtai. Vs 8-9

"Hikom'a chapang khat aumin ama chun sap chang'a kitem changlhah phengnga leh nga ni" atin ahi. Pathen a kon'a thil hung soh doh hi mi hem ngaito

toh abang pon ahi. Mizoram a Pastor khat chun mijouse atousah in hou in sahna ding'a koi koi ipan diu ham tin aban chan akoh in ahi akiti. America gam'a jong mivai chahon ape jiuvin ahi. Ginchat um lou tah in Va-ah chun nehding an,sa ho apon Elijah agapen ahi. Pathen in thil boltange ati leh Va-ah ho jong aman chah'a Themgaopa vah'a apan sah thei ahi. Pathen thilgon hi ginchat umlou miho chung'a na atongjin ahi.

5. Pathen a ima ahimo aumpoi. Vs 10

Jesun "Mi ho chu tousah un" atin ahi. Mi 5000 ho chu hamhing lah'a chun atou taovin ahi. Pathen thu'a inun teng leh thil kidang asohjin ahi. Ei hon itahsan nao kalval'a thil kidang abolji ahi. Police officer khat hi thusei ding'a atemuleh aman Genesis 22 akonin hou lim abolin ahi. Aman ase na a chun Police ho thil vet dol'a vet ding hileh Abraham hi matding jail'a koi ding ahi ati. Ajeh chu aman achapa chu thading'a agot ahi ati. Abraham chu thua anungin,aneisun achapa chu akat doh in ahi. Pakai jin hamhing lah'a touvun tia thupehn anei chu thua anun-

gun ahi. Pathen in ei ho jouse jong a thu a nung dingin ei kou-vum ahi.

6. Jesun thil kidang aboltan ahi. vs 11-13

Pakai Jesu leh mipi kitho khomin thil kidang asoh in ahi.A).Jesun alan: "Chuin Jesun changlah alan,Pathen alhaijin"Jesu chun Pathen athangvah nahi thupi tah in agelin ahi.Pathen athangvah chu Jesun thupi tah in akoi jin ahi.Ajeh chu "Pathen chu aum pou leh themcha jong chu tamtah a soh'e "(Little is much when God is in it)ti chu atahsan ahi.Pathen chun tamtah asosah thei ahi.Pathen toh ipan khomuva vaicha genthei ho ivah diu ahi.

Thuchaina:

Chapang pa anu chu itih akipa tadem? Achapa a dia neh ding asempheh.Chapang pa chu ichan in akipah tadem? Athilpeh chu neo cha bou ahi. Hijong leh mi 5000 akivahva jouvin ahi. Hiche chapang pa hi ahinkho kikhel tei ding ahi. Mihem'a hithei lou ho jong chu Pathen apan teng abon chan ahimo aumjipoi. Asim jouse Pathen in Phat thei boh hen.



Theology

sim dinga nakigot tah'a ahileh...?

Rev. Silas Boipu

Theology simho chu pastor a pangding hijeng'u hilou ham? Hichu tunia eihon ihet dan'u leh vannoi mi atamjon agel dan chu ahi. Mi khatchun theology jilna ahin chaiteng Pastor tilouvin tohdng tampi aum in ahi. Counselor jong hithei, Para Church/NGOs lah a jong tohthei, missionary ajong chethei, evangelist jong hithei, ji-phatah jong ihi thei u ahi. List tamtah kajaosah lou aum'e. Ahin, tunia kaseinom chu hiche lang chu hijep louvin, theology hi hoilai a simthei, ipi iti kigot ding ham? Or, kouna nachan dungjui a nasim ding dan lang kiseikhom, kigelkhom leh kadeijin ahi. Chuleh, adeh in, kana umnasa jong ahijeh in Korea a simnathei leh kigot dingdan kaha seinom in ahi.

Ipijeh a theological degree ngaikhoh ham?

Practical reason chu ahileh Pastor khat hina dingin theological degree angaijin ahi. Seminary pha a nakai leh ministry a dinga nakigon na hoiding ahi. Chuleh, Pathen thugil leh mihem hinkho a mopohna neiding khat nahitah jeh achu kichuhna pha nanei masah ngai ahi.

Tulai ahi seminary a kihilna ho hi ministry a dinga relevant hinam?

Tulai hin mijousen Bilbe asim theitan, Bible commentary leh theological dictionary leh lekhabu jatchom chom jong asim tauvin ahi. Ahin, Bible jilna kisuh neilou hon Bible interpret bolding dan ahepouvin, Pathen houdan leh hetdan akum kum a ahung kikhel dan jong ahethem pouvin, Pathen thu agilje leh ajao jedan jong ahethem pouvin ahi. Ajil nahilou leh ipi theological view nanei ham jong

hethem theipon nate. Chuleh, seminary a phatah a trained nahi a kona Pathen thua dettah leh thuh tah'a kibulphuna nanei thei a hiche chu midang nahilson a napehson thei ahi.

Full time ministry a lutlou ding honjong theology asimthei ham?

Theology simhi eima tahsan na kibe leh suhhat nadinga jong phatah ahi. Seminary ho a subject jatchom chom Christian

perspective a kisim jong aum in ahi. Tekah na in Christian counseling, communication, history kiti hohi Christian perspective a kisim ahi.

Seminary hoa ipi pi kisim ji ham?

Seminary ho ahi Genesis apat Revelation chan athucheng jouse kisim ahideh poi. Alhangpi a sei dingin, OT leh NT, theology, history, mission, counseling, communication, religion, ministry and leadership ho akisim in ahi.

College ipi ti kalhen ding ham? College lhen ding dan hi achomlam seidingin nangma thu thu ahi. Ahin, nasim chai nunga nanatoh nading ngaito puma

college lhen aphai. Tekahna in unaccredited college hoa nasim leh nachaiteng natohna ding mu hahsa jepthei ahi ajeh chu houbung leh organisation tamtah in nalah nomlou ding ahi. Academic lang natha anop a khonung teng theologian/biblical scholar/teaching ministry a nalung alut leh India sunga dingin Serampore ahop jaopen in ahi.

Serampore leh ATA



Kouna nachan a theology sim dinga nakigot tah a ahileh India ahin theological seminary ho accrediting university/authority ni aum in hichu Serampore University leh Asian Theological Association (ATA) ahi. Hiche teni noiya um col-

lege/seminary aja aja a sim india a aumtan, hiche noiya chu nasim tei pha inte.

Serampore hoina:

1. India a dinga university lui loipen ahi jengseh hilouvin University len loitah, chuleh college 100 nailam kikhaina ahi.
2. Academic lang asang in ahin lekha hahet theilou ho dingin jong nemcha in abolkit uvin ahi.

3. College jousen syllabus kibang achoi uvin, exam pattern jong akibang in ahi.

4. Serampore a chai ho chu aban simna dingin hoilai mun ipi university noi hijongleh aboi pouvin ahi.

5. Ministry lampang ajong Serampore graduate khat chu koiman anolpon ahi.

6. Academic lang lunglut nahia sangtah simding, theologian or biblical scholar hiding natup leh Serampore hi nasim nading munchu ahi.

Ahoijep louna:

1. Academic aha focus jep jehin abang kom teng a theology uhi a liberal behseh e tin ngoh-na aumjin ahi.

2. Syllabus hi rigid behseh e, kolgam a dinga pha chu north east a dingin aphapoi, or Sri Lanka, Bangladesh, Nepal hodin ahoi joupoi or ahop thei jipoi ati jiuvin ahi.

3. Expensive behseh jeh in koi-ma pouvin asim jou jipoi.

ATA hoina:

1. Hop jaotah, Asia pumpi hop ahijeh in Asia sung nah naha akithol in ahi.

2. Syllabus jong flexible ahi.

3. ATA noiya seminary atamjo serampore a hobangin expensive pon ahi.

4. Ministry aha focus uvin, evangelical theology aha khohsah jehin eiho context a dingin apha.

5. America, Asia leh Europe dunga higher study chena dingin lampi akihong penguin apha.

Ahoijep louna:

1. ATA college hohi ama ama college in apon ahi. Abang ATA college chu asang a sang, abang nemcha ahi.

2. Common syllabus leh exam aumpoi.

3. Serampore toh te dingin academic vang nemjep in akilang.

4. Accreditation mu abai jeh in serampore affiliation mu joulou ho leh mujou dinga kigel louhon accreditation akilah

uvin ahoilou na neokhat aum e.

5. ATA graduate hon aban serampore noiya sim ding ahahjep in, serampore noiya college hoa jong mihil in apang thei pouve. Serampore a hovang ATA a aboipouvin ahi.

Unaccredited College ho



Serampore leh ATA noiya umlou India sunga seminary adimdoh in aum in ahi. Mi tamtah in hiche ho ajong chun asimthou uvin ahi.

Aphat chomna:

1. Hiche accredited hilou seminary hohi atamjo hi free tuition, scholarship, or work stipend ho amu jiuvin, eiho mi genthei ho Bible simnom a fee ding neilou ho dingin apha.
2. Eima chang tuma Bible henom ho dingin jong apha.
3. Eima chang a ministry bolnom ho dingin apha.

Ahoijep louna:

1. Hichea hinsim hohi achai nungteng uleh tohna mun amu hahsa jep ji e.
 2. Kihilna jong atamjo fundamental teaching ahijeh in hetna ajao joujep ji tapoi.
 3. Degree mu jong abai valjep jehin mihon agel thupi thei pouvin ahi.
 4. Hiche muna anasim hohi atamjo ana hetthem loujeh leh genthei jeh ahinom jon, deisah jeh a sim aum behpoi.
- Achunga kisei hi alhangpi kisei



ahin, hichea kona hi hoilai a sim ding ham ti nangman naki lhen-them angai in ahi.

Foreign a theology simthei ham? Simthei ahi. Ahileh, Foreign a iga sim chu ipi phachom a ham?

1. Ithil mu dan ajao jep tei in ahi.
2. Midang jat chom chom, mun chom chom, hindan chondan chom chom hoa konin jong jildoh tamtah akinei theijin ahi.
3. Loi le pai pha pha khonung a tohkhompi ding aki kitem doh thei e.
4. Eiho sanga khangtou jo ho thilbol leh Pathen houdan leh

natoh dan igamu akon in thil tamtah akijildoh be e.

5. Kihildan jong advance technology ho akimanchah jeh in ahoijon ahi.

6. Oja ho jengjong jilna leh hetna sang-tah tah nei ahijeh uvin apha.

7. Ministry a dingin ahop jaojep e.

Achutileh, Ipi lti iga simdiu hitam?

College admission masanga neiding hochu

1. Indian Passport
2. English test score: Interna-

tional English Language Testing System (IELTS) and Test of English as Foreign Language (TOEFL)

3. Graduate Record Exam (GRE) score: hiche hi US a Ph.D simna ding jousea angaitai. Chuleh, seminary sangjep honjong BD/M.Div leh M.Th simna ding jong angaisah uvin ahi.

4. Paisa

College admission process

1. Tulai hin midang chung a kinap/kingai ngaijong bol angai tapoi. Google a eiman kihol jengthei ahitai.

2. US a Association of Theological Seminary (ATS) noiya kikhai college aja ja sim aum in hiche ho khatpen a simjeng thei ahi. Europe le Asia mun dang hoa vang agam Government recognized university ahileh apha.

3. Tulai hin college atamjon English test score angaitai.

4. College atamjo, abon tobang hi online application jeng ahi, tichu application online a fill up ding, submit button click a pehlut ding, chuleh certificate ho scanned copy upload ding ham or email ding ahitai.

5. Application hohi processing fee atiu khu ipeh tokah a process jilou u ahi.

6. Application accept abol jouteng uleh I-20 (admission certificate) eihinthot diu hichu kichoiya US embassy a visa interview a dinga lhaijel ding ahitai (US embassy a interview appointment vang lah masah angaiye).

Hetdinga pha phabep

1. US hohi very prompt ahiuvin, seminary ho website uva contact kiti holdoh inlang contact lechun ajingteng nahin donbut pai jengdiu ahi. Or

email lechun nahin reply pai diu admission process nahin guide jengdiu ahi.

2. Toefl leh IELTS score sang imu louleh college pha mu ahah jin ahi.

3. US ahin full scholarship munathei college avang e.

4. Chuleh, jinei nailou ho dinggin reputed seminary ading ahi louleh visa mu ahah e.

5. Ph.D program a dinggin English test score banah Graduate Record Examination (GRE) angaitai.



PATHEN LUNGDEILAM

Rev. Kaikam Chongloi
Secretary, Men Department, KBC.

Text: Rome 12:1-2

***¹Chuti ahijeh chun, sopite, Pathen lungset vang hin natipumpiu chu longlhen thengtah gan kihinglha'a bangin Pathen lahthei doltah in Pathenna kipeuvin, tia kahil nahiue, hichu nalunguva lhagaova nahounau ahi.
²Chule nangho tulai vannot leiset chon hin chon hih un; Pathen lungdeilam, hichu apha lah theile phat chamkim hi ipi ahi nahetdoh theina dingun lung thah keng unlang lim chom pu-uvn.***

Solchah Paul in Rome bung 1-11 sungin tahsan thuhil ho (Doctrinal teaching) ahin seipeh in, Bung 12 a patnin tahsan chu toh'a vetsah dingin ahil'e, hijeh chun gan kihinglha'a bangin Pathen'a kipeuvin ati. Old Testamant phatlai chun chonset thoidamna dingin gan kihinglha (scape goat) gamlah'a ahingin alhajiuvn, hichu Israel chte achonsetnau apohmang ji ahi (Lev. 16:10,21). Hijeh a chu na hinkhou chu chonset nen beh louvin Pathen a dingin gan kihinglha bangin peuvin ati ahi. Hichu Pathen lungdei lam jong hiding ahi.

I. Pathen Lungthim peh ding (verse 2)

Lungthim hin polam muthei natoh ho hi athunun ahin, lungthim hi joulhepna jeng dim ahi. Hijeh'a chu Pathen dinga akipeh theng louleh satan natohna mun hiding ahitai. Bible in numei jon lunga ve a chu amanu chutah jonga ahitai ati. Thil ibolding jouse hi ilungthim min ahet masatpen ahijeh chun Pathen lungdei lam suhbukip na dinga ilungthim'u Pakai peh angaije.

II. Pathen na dia Thenna Hinkho man di:

Christian hinkho hi thenna in ajui loule, vetjui thei ihilou le, Dr. Luke in

14:34-35'a hitin aseiyé. "Chi jeng jong tam taken lang, a-alding bangin al tahir le apanna aum tapoi" atibang khu kihiding ahi. Peter in nakoupau Athen bangin nangho jong nun le khanna theng un atin ahi. Thenna hinkho kaman ham ? kaman lou ham ? eima leh eima kikhoh angaije. Mi abang khat chu mimu dinga hinkho theng mang apha tah tobang nga um ahija la aning langkhatna min amu lou pou leh anop nop boljeng, tongjeng thei, mihem mu ding kicha, Pathen nin amu lam geldoh lou akitam tan ahi.

Francis Quarles, British lasem them Queen Elizabeth khon dom'a pangpan "Kahinkho kipat til lai jin Pathen tahsan lel na lampia lheplhah in kaum dechet in, hinla Pathen chu kanel theilouna dinga eithujo a pang chu kapa chonchan suhling hoi hiloule vetjui dia lom ahinkho chu ahi" tin anasei kit'e, achutileh eima hinkho kivet'u hite.

Leng Solomon hinkho ivetle abullam ahoilheh jengin Pathen komma chihna athum lai jin Pathenin alungthim chu aki-papi behset jeh in Houna jong apehtha tan ahi. Pathen deisahna achange ti imu uvin ahi. Ahinla thuneina ahinnei phat in mitamtah thuneina in asuhset ji bangin amajong suhset in ahung

umtan chonphatna lamma alhasam tan ahi. Chihna sangtah neijin vetjui thei ding hinkho thudol a vang alhasam tan ahi (Proverb 31:4-5; Leviticus 10:9).

III. Pathenna dia insung Kisem-tup ding (Joshua 24:1)

Joshua in ateh lam athikonlam chun Israel phung abonchan Shechem kho'ah akhomsoh keijin ahi. Egypt gamma kon ahungdoh uva pat gamtep Canaan gam alo uva achenpha geijuva amaho dinga Pakai Pathen natoh ho avelsei kit in athah geldoh sah kit uvin, hiche toh kilhon chun Israelte jouse chu Pakai kin boldingin challenge ana bollin, ama le ainnsung mite jousen Pakai kin jeng boldia thulhuhna (decision) alah dan'u akimun ahi. Eiho jong kumthah 2017 hi Pakai natohna'a panthah lahna dia thulhuhna sem pum'a igalkai diu kanomin ahi.

Hijeh chun itahsa pumpi, ilungthim pumpin, longlhen thengtah gan kihinglha banga Pathen lahthei doltah in kipeutin, Pathen lungdei lamin insung semtup'u hiute.

Psalm 139:23-24 na'a aseiban-gin, Pathenin ilungput, ingaito aboncha aheth ahijeh in Pathen lungdeilam in hinkho mang uhite, Amen.

VISION

iti nahet em ?



Rev Onthang Haoakip

Mihem hinkho a Kho-mutheina(Eye-Sight)ineiju hi amantam lheh e. Mit khomu kisuh lou hon sum le pai tamtah sengin akijen un, mutheina dingin mitbeh mangloi jong akium'in ahi. Kho mutheilou mitcho ho kho agenthei lhehuve. Kho phatecha a muthei hi Pathen thangvah umtah ahi. Mit a imuthei banga Lunggil ngaitona a Pathen lungdei ho muthei ding hi kultah ahi.

Vision hi ipi tina ham?

'Vision' kiti thucheng hi polam chuleh sunglam mutheina tin Dictionary leh lekhabu tampi ah akimutheije. Pathen in mihemte thilpeh manlutah eipeh hou lah a Khomuna(eye-sight) hi khat ahi. Mangthem a Pathen loupina mudohna dinga Pathen in eipeh u hijongleh mudan/vetdan dihloou jeh in chonsetna akilhatheije. Mitmu kicheh lou, ahilou leh kho mulou ho chu 'Mitcho' tinjong

akihei. Mitmu kichentah a thil imutheinaban'ah Gao thu hettheina 'VISION' itipen uhi Prov. 29:18 ah "Gaothu kiseina louna'ah mipi amang thah jin(English Bible a chun"Where there is no Prophetic vision, people perished")tin akisun e. Hichea eihet sah u chu "Lungmit'a khonunga hunglungding Gaova thilmu kicheh tah neithe hi Pathen thilpeh ahin, mihem hinkho a dia thil kiphamo tah ahi".

Pastor Taiwo Kyode(Japaness Pastor khat) in hitin aseije, 'thilmu(sight) kiti hi 'mit(eye)' natoh ahin, khonung ding thilho mutheina(Vision) hi lunggel natoh ahi' ati. Hiche thucheng Vision hin 'Mit a imubanga khonung thil hung lhung dingho eimusah un, hetchet theilou leh ahitheilou ding thil ho jong Pathen tahsanna thahat in kichehtah leh hitheilom tah in eimusahtheije', ati.

Vision kilahna ho:-

Thuchih kasimdoh khat chun, 'Vision neilou mi chu khonung neilou ahin, khonung neilou mi chu ahinlajja athisa ahi, Vision nei mi chun tohdoh aneiteiding', atin ahi. Imopohna dol a Vision kicheh tah nei angaijin ahi. Tulajja alimpol hon Vision atiuva akilomlou thil mudan a

akisei jihou tobang hilouvin, Bible thusim le Houbung khang kipat a pat tukhang chan a Vision neiho phabep gahveohite;

1. Pathen in athilgon ho mihemte hetsahana din malai themgao ho anamangchajin ahi. Isaiah, Jermiah, chule adang tampi'n Israelte chungahung lhung ding thu anaphong doh jiuve. Pathenin in Daniel chu Vision apei. Daniel leh aloite chu athemjilnau mun a jong nikhat leh Jerusalem lam nga'n thumvei chan ataojiuve ti imu've. Hijeh chun Pathen in Daniel le aloite achoisingin, khonung thilsoh ding ho amusah in ahi. Lenglen le gilou tah Nebuchadnessar jengin jong Pathen achoian in, jabolna ahinpetai ti imu'uve (Daniel 2:20-23).

2. Houbung khang kipat tillai thusim ivet leh Solchah te ho chu anngol in ataojiuvin, Pathen in thisoh dingho hetsahna ahinpejiuve ti akimui. Chonsetna leh khangitlouna ho hi ana doudal un, thutahle hangsan tah in Pathen thu ana hettah sah un ahi. Pathen tahsan in ijakai aboljiuvin ahi. Thil kidang abol u, chule ana ho adamsah u chu mihon amutengu leh Pathen avahchoijiuv in ahi. Pathen tahsanna detah leh kichehtah nei hi 'Vision' dihpén, Pathen manchah leh

deisah ahi ti iseidoh nom chu ahi. Tunin jong Houbungsunga Solchah te tahsan leh natch thilbol banga itoh diu hi ngaichat ahijing nalaije(Acts 15:1-22).

3. 18th Century lampeh a Lhumlam gam'a kon Missionary ho, Hudson Taylor(China gam), William Carey(India gam'a), David Livingstone(Africa gam'a) chul eh adang Missionary tampin lhagao mangthai ding ho huhdohna ding lunggil ngaitona aneiju toh kilhon'a hinkho phal'a avai kondoh nauva lhagao muchi anatulut'uva ga asodan u thusim ho ngaito kultah ahi.

Tukhanga Houbung lamkaite:-

Tukhang Houbung lamkai ho mopohna chu, Chung'a ihinseiju Gao thu hi Charismatic loijin avop u tobang hilouvin phat nunung ahitai, Pathen gam anaitai, Satan in Christian ho lamchom chom a alheplah nom ahijeh a atahsan ah Houbung mite ho iti puihoi ding ham tithu a Vision kicheh tah Ineilouva khoh ahi-tai. Tukhanga mihemte atamjo lam lungput leh natch hohi alhangpi'n vannoi chena lampi ijuinau akilang in ahi. Houbung sunga kilamkai didan, kivaihom didan, kiloikhom dan ho Pathen (lekhabu) Bible a imu hou sanga leiset chihna a kivaihomna Dan

le Mol ho thupijo'a ilahnom nao jong umda jilou ahi. Houbung lamkai kilhendan ho jong MLA Election kiboldan toh akilona chan jong aumdaipoi. Houbung lamkaija kilheng doh hon Pathen in ipi tong dinga eipansah nom ham ti geldoh jilou lamkai umda jilou ahi. Houbung lamkai konkhat in Half Tithes kapeh lou leh ko'n i-eilotheding ham ti lunggel neiloj jong umdan in thu akija jin ahi.. Houbung khandouna ding igelnao vah Pathen douna thil tampi iboldoh joh diu kichat aum e.

Tulai hin i-Houbungsung dinmunho ivet leh khonung ding thil ngaitona leh mutheina Vision hi akiphasam lhehtai. Khonung/Gao thu seijong akingainomtapoi. Kivaipohna Dan le mol ho jong Bible a ho juisangin eima deija suhlandang theina akideijo gamtan ahi. Tekah na'n mikhangtou ho gam a Pa le pa, Nu le nu kikoi/kicheng ho Houbunga lahlut ding phatsah kitiho bang khu tijat umtah ahi. Organization a chena lhongpi ineihou jong ngaisahna alhasamtan ahi. Ipijeh hintem? Pathen ginna leh ngailutna ilhasam jeh hijeng lou ding ham? Phaten ngaito phauhite. Atahsan ho kiloikhomna(vetsahna'n Kuki Baptist Convention) noija

umho chengsen ikhantou theinadiu vision ineicheh diu kilom tah ahi. Kiloikhomna sung'ah pumkhat hina ding Vision angaije. Kijato angaie. Kingailut kikhohsah to angaije. Kitahna angaije. Hichu thildang a hilou, Pathen lenggam kehletbena ding bou ahi.

Thuchaina:- Tahsan chaten 'Vision' ineidiu aphantna chu, Pathen thilgon ho hetdoh a asubulhit a ipanding u ahi. Houbung sunga thil lhungho adihlam dol'a juithem theiding hi Pathen lhagaova thil het theina neiten bou aboldoh thei diu ahi. Hobung sung hi Pathen lenggam ahin, Pathen lenggam a chu Pathen miten Pathen lungdeihoh kichen tah a het a, Alenggam khantou sahna thei Vision neiding hi Pathen lunggot ahi tia iseinaova Pathen in phatthei ei-bohtaohen.

Missionary (L) Lalam (Haokip) Narjinary

L H A N S O N G



Missionary (L) Lalam (Haokip) Narjinary
(Arunachal Field) athikal kumkhat alhin ni Nisim 24 Feb. 2017 nikhon aloipa Evan. Nabin Narjinary in Hetjingna song adopheh tai.

Mission Column

CBCNEI Mission consultation

Tuni phat a CBCNEI Mission consultation meeting Dephu a kaga chena report pethei ja kaum jallin Pa Pathen hatchung nung kathang vahe.

Dt.18 ni Liangmei Naga Baptist Association Mission Secretary pu Pastor Lb Angam toh kakilhon hon in, Nagaland Govt. Women reservation bill jeha boina akhoh pettah ahijeh in lampi chele ana boithim e. West Dephu Baptist Church houbung neocha ahivang un anneh tuidon gena touna hoisel in eibol peh un kipa aum lheh e. Ahideh in ahung kikhom ho jouse chu Hotel a eilhungsah un nom kasa lheh un ahi.

CBCNEI Policy thah khat NE gama Christian tamlouna hole Bihar chule Jharkhan jaonan district jouse CBCNEI mission in hop soh keija akidalha um lou hellu Council a kikhai lha Association ho District khat cheha lut a Pathen na toh ding ti kinop to na ahung kinei jin ahi. Hiche kinop to na dungjui hin lekha a District ho min kijih a kilhep akila in ahileh Tripura gamma Dhalai District sung akilah doh in ahi. Hitia mijousen district khat cheh akilah doh jouvin ama kilah doh dist.cheh chu a gam map mission secretary hon akituh in hiche lai dist a chu ipilam pena mission na gatoh ding ham ti gel pumin Taona akimang khom in ahi. hitihin NE states ho ahideh a Assam, Arunachal, Tripura, West Bengal, Jharkhan Chule Bihar a hi tohkhom cheh ding in kinop to na ahung kinei tai.

Hiche mission meet a hin foreign gama kon lamkai tampi ahung pang in, Kum phabep Foreign gama Pathen na ihin toh khom piu chule tua jong itoh khom piu Rev. Dr. Andrew Kim jong Resource person khat in ahung pang in ahoulim na a eiho missionary China, Lao le Cambodia a ho ahin min phah in kipa kithang at aumleeh in chule clip a jong amelu muthei jin ahung um khan ahileh kipa um kasa lheh jeng e. Ahideh in KBC bou hi gamthum a missionary sol ahi atijong kipa um tah khat ahi. Aje chu Association dangho hi gamthum jena missionary solkhom koima um loudan ahi.

21st February nihin kahung kikhen doh un keima jong damsel chan kahung lhung kittai.

KBC Mission Board in hitabang meeting thupi tah khat a pan gala dinga eingan se na chung a kipathu kahin seijin chule kakalson nadia programme lol-

hin nadia taona a eihin kop ho jouse chung a jong kipa thu kahin seije.

Pathen in KBC Mission phatthei boh jing taken.

Dr. Andrew Kim visit KBC Office:



Kum phabep pi Mission na ihin toh khom piu south Korea a kon Dr. Andrew Kim in achesa nisim 21 Feb. nichun kbc office ahung vilin ahi. Aman Staff Devotion alan China Lao chule Cambodia a mission na itoh nao report jong kicheh tah in apen ahi. Eihung vilu kipa na jallin Mission Board in ngong'o khat aki opeh in ahi. Foreign gamma mission na itoh khomnao kihou limna jong akinei khom pin ahi. Pathen in ama le ainsung mite jouse phatthei boh henlang Pathen na itoh khomnao va lolhin na ei pejing tao hen.

Evan. Ghatani le Premila Kharel

achesa 28th February nin Pastor Lunkholal Haokip, Gb. 5 in Janggopna neita



Kipa um tah in pathen in ama natong ding eiho KBC eipeh be jing un tukum kumbul February Iha a chun Chingmeirong Imphal area a mopodin Bijay Ghatani hi Mission Board in ana kilah ben ahi. Evan. Ghatani chu achesa 28th February nichun Keing neina ana nei jin Pathen na toh khom pidin Premila Kharel to kichenna theng ananei hon tan ahi. Hiche kichen na thenga chun Pastor Lunkholal Haokip Gambih no 5 Minister in apang in Maohing Baptist church muna kikhut suina ana nei hone. Hiche kichen na kingtheng a hin Mission Board in jong pan aga kilan ahi. Pathen in anatoh na lolhin na pehen lang chule chale naovin vang le ham boh jing taken.

Mission Week

KBC pumpia ana kimangta:



Kum seh a ihin man ngai bangun tu kumin Mission Week convention pumpin akimang e. Houbung mipi mission natoh lama tilkhon na le machal nading lampi akisei phong e. Apat hi Manipur Assembly Election to akito jeh in chele vale akilem tapon speaker dinga kingan se ijat hamkhat che joulouna jong ana um khatai. Hita jong le pontho tah a ama gari kipoh doh a che hole cheteiding go a genthei taha lampi kigon a che ho jouse chung a kipa thu akiphong e. Speaker ding kisollou na houbung hon jong agambih pastor ham ahilou le Head Deacon ham thusei in amang un Mission Sunday akimang cheh e. Mission week sunga envelope ana kihom doh ho agangthei penna ihin suhkim kit uva gambih

lamkai ho, Pastor hole houbung lamkai hon ihin gelkhoh kit diu vin Pakai minin temna le hetsah na ahung kinei kit e.

Pathen in KBC ama lenggam natong jou jingdin phatthei bohtahen.

Missionary ho din tao jing ute

Changval hihen houbung hijong le mission na itoh naova hin asol aumin ache aum e. Tunin Pathen na itoh naova hin ache sangin asol atam jon hichu ahiding mong jong ahi. Missionary Evangelist khat isol doh teng kichai jeng ahipoi. Tunia kbc in missionary hijat isol doh thei hi kipa umtah ahin pathen phat thei ichan nao lenpen ahi.

Kum ni mi gam'a Pathen na ahin toh jou un china, Laos, Cambodia gama um missionary ho innlama ahung doh un kipah tah in anakilam ton amaho jong houbung hotoh akihet to ding le a ministry report u apeh dingdu deisah jallin gambih phabep tour anakibol sah in ahi. Anatoh naova seiphat chang ahinao le maban a jong tong jom dia kigellhah na aneijallun Convention General office a konin appointment letter akipen tua lhah amaho hi kbc worker lhing set na pathen na migam a ahin toh dingdu ahitai. Hito kilhonin tuhin atohna mun a tong jom din Miss. Sherlyn Lhingpineng Khongsai 25th February nin Laos gamjonin achetan, Letkhohao Haokip hi 6th March nin Cambodia gam jondin anakipat doh kitai. Mis. Lhingneikim Haokip hi Doctor Advice dung juijin vaigei jepa che din aume. chule Mis. Letminthang Haokip hi Aji toh China gama march lhakichai lam le che ding ahi. Amaho cheng in Foreign gamma Pathen na ahin toh uva alohin nadiu le Nepal chule India gamsunga missionary hole Evangelist ho alohin thei nadiu vin tantih neilou vin taonan geldoh jing u te.

Pathen lungsetna damsunga Pathen na tong dinga hung kigel lha a pan hinla KBC hop sunga Missionary Evangelist ho jouse naija, gamla a amopoh nao akibang in eiho taona angai cha jing uve. Chim louvin amaho din taonan pang jing u hite.

MEN WORK COMMITTEE GAMBIH 15 TOUR

February 26, 2017 (Sunday) ni jingkah matah in Men Work Committee cheng Gambih No.15 a din aki kalsongin damtah in 6:30 Am donin C/C Chavangphai akilhun toh Ihonin Houbung mite toh Houin aki kaikhomin, Men Department Secretary pu in thupi aseijin ahi. Chule Houbung miten jingkah nilhah in Antui tah tahy eineh sah uvin hijeh chun amaho chung a kipathu seijou lou akiphonge.

Vaijin/sunin Moreh Baptist munna Gambih Men lamkai ho leh Pate ho toh Seminar akinei khomin Rev. Kaikam Chongloi, Secretary Men Dept. in ipi ibol uleh Men Dept. hi khangtou ding ham ti leh LOM Resouce chung chang nga houlimna aneijin chutoh Ihonin Group Discussion jong akineijin, Gambih Pate ho a konin jong lunggel (Idea) hoi tah tah ahin podoh uvin ahi. Chule Pu Lienboi Singsit President le Pastor Haopu Haokip, Principal Dr. Colvin in jong houlimna aneilhon in ahi.

Seiminar a mi 50 vellan pan ahung lauvin, noptah leh lolhingtah in programme akichaijin, lunglut tah leh tomngai tah a pan hungla Gambih No.15 Pate ho jouse chung a kipathu akiphongin ahi. Nilhah in Moreh Baptist Church munna Houin aki kaijin, Pu Lienboi Singsit, President Men Dept. in thupi aseijin ahi. Lhunna gena leh Monday jingkah An eineh sah'ua Moreh Houbung mite chung a kipathu seijou lou akiphonge.

Acheho: (1) Pu Lienboi Singsit, President (2) Pu Nohsei Haokip, Men Work Comtt. (3) Rev. Kaikam Chongloi, Secretary, Men Dept. KBC. (4) Pu Holpao Haokip, Driver KBC.

Pathenin KBC Men Department phatthei boh jing taken, Amen.

Rev. Kaikam Chongloi
Secretary, Men Dept. KBC.

Women Column

Lydia Resource Centre a ding a kilam doh thil thah ho thensona 2017 BATCH TRAINING HONDOHNA



Women Assembly a kisei bangin Prescilla ten kumkhat mi 10 Sponsore eibolpeh diu chu Gambih No.1-10 sunga Gambih khat a mikhat cheh ahinsol diu kiti bangin achesa nisim 10/2/2017 nikho in Gambih lamkai hon Lydia mun'a ahungthah cheh un, Women Work Committee hon Vailhun na le Chadon khompi na le taopeh na akinei uvin, 15th Feb, 17 nikho in Lydia Supervisor nu Office dingle aum na diu Room chule thil thah kilam doh ho jouse thenso na Dedication Programme neocha akineiijin, Gambih No. 8 Pastorpa le G/ No. 8 Nute Lamkai ho jaona in Rev. Dr P Chongloi Pastor C/C Tuibong KBC kin thempu hina in Apa, Acha chuleh Ihagao theng minin Kot hondoh nale thenson na ana kineitai.



Lydia Resource Centre

Prescilla Guwahati te toh kum thum (3Yrs) toh khom na dinga nopna (MOU) soi Dt 22/11/2016 nikho a KBC Office Chapel hall mun'a ahung kibol toh kilhonin KBC General Assembly in phatsahna pehna eipeh utoh lhonin tuni chan geija amaho a kon'a thil a le sumle pai a kimu ho noija hin kahinpei.

Lydia Pon khongho a dinga tuni chan a kimu:

1. Kangthon (Beds)	11 x 4600	=Rs 50,600/-
2. Matress (Ponpha)	11 x 4000	=Rs 44,000/-

3. Pillow (Lukhap)	10 x 150	=Rs 1,500/-
4. Armless Chair	15 x 550	=Rs 8,250/-
5. Puro Water Driinking	1 x 9300	=Rs 9,300/-
6. Steel Almirah (2)	2 x 6500	=Rs 13,000/-
7. Steel Rack (5)	5 x 4000	=Rs 20,000/-
8. Dinning Table (2)	2 x 7500	=Rs 15,000/-
9. Boil Water Pot	1 x 2300	=Rs 2,300/-
10. Computer All in One (thil a eipeh u)		
11. Printer & UPS		=Rs 19,200/-
12. Glass Set	Pieces 10	
13. Steel Plate	Pieces 10	
14. Lhaseh a Instructor le Supervisor Salary		=Rs 18,000/-
15. Ponkhongho Mess Fee ding 1000 x10		=Rs 10,000/-
16. Raw material chohna ding		=Rs 10,000/-
		2.21.150/-

Meithai nikho

Programme thu a Hetsah le Tiemna:

Ahung lhung ding April 23, 2017 Sunday nikho hi meithai nikho hung hiding ahitan, Women Assembly kilolna **No. 3:46:2016 (B).** a kisei banga prog, atuma hung kisem talou ding, amavang ama ama Houbungin pha asah dungjui juva akisem diu, thilpeh jong Compulsory hisah tah lou ding, Offering angai banga Office langa ithah cheh diu kiti bangin hiche Thuso hi mangchan Houbung mithengte ho jouse henga hetsah le tiem na ahung kineije. Pathenin ikiloi hkom nao Kuki Baptist Convention phat thei bohjing taken.

Kaki pah e

Pakai lhacha,
Lhingjanem Haokip
W/Secretary,KBC

KBC NO.11 YOUTHTE AN-NGOL TAONA CUM SEMINAR LOLHINGTAH A KICHAITA:

Achesa Nisim 24-26, February 2017 nikho sungin KBC No.11 Youth Department tohgonna noija kumsunga boldia ana kigong Gambih Youth An-ngol Taona le Seminar chu C/C Sangaikot Houbung mun nah Pathen mapuina jallin lolhingtah in ana kichaithei tan ahi.

Hiche kinsunga hin mailam a Exam bolding Simlai mi phabep Pathen henga vang thumpehna taona Pastor Tingoulen Haokip in ana neijin ahi.

- * *Pastor Tingoulen Haokip, C/C Sangaikot Pastor pan Programme Thempu hina le Devotion a Pathen thu ah ina lamkai un ahi.*
- * *Pastor Satminlen Khongsai, Youth Secy, KBC Thumun (Speaker) le Seminar class ah Pathen thu ah eina tilkhon un ahi.*
- * *Khonei Houbung jong thille lo, avat apa, tha le jung in jong pon pantah le ngailutna neitah in ei kithopiun ahi.*

Lolhinna eimusah'u hatchungnung Pathen thangvah in umjing taken.

*Chairman,
Letkhosei Haokip
Youth Department, KBC No.11.*

*Secretary,
Jangkhohal Khongsai
Youth Department, KBC No.11.*

KBC GAMBIH 12 CONFERENCE

February 9-12, 2017 sung in 16 channa KBC Gambih 12 Conference chu Molphei vangkhua Rev. Ngamjapao Haokip, General Secretary, Rev. Tonglal Haokip, Gambih Pastor le Pastor Onkho Haokip, C/Church New Lambulane Speaker hinan "Lungthah semun lang lhagao thah keng un" (Ez. 18: 30) thupi mang cha in Houbung 24 akon mi 1350 val kikhopna chu lolhingsel in ana kichaitai.

February 10 nikho chun Rev. Ngamjapao Haokip, kinthempu hina in 30 lakhs val a kisa Molphei Baptist Church chu then-sonna ana um tai. Pathen thangvah in um hen!

YOUTH LEADERS SEMINAR

KBC Youth Department tohgon na noiija tukum jong Youth Leaders' Seminar hi semtohi le gontoh in ahung umtan hito lhon chun Shalom Theological Seminary tetoh pan lahkhom'a bolkhomding tohgon ahung umtohi kilhon in anoiya banghi gontohna ahung kineitai.

Apangthei dingho:

- KBC Houbung jousea Youth Lamkai cheng
- Centre Church jousea Youth Lamkai cheng
- Gambih Jousea Youth Lamkai cheng
- KBC Pumpia Youth Service (ipi lampang hijongleh) boljouse jong

Anikho : 21 April 2017 Friday

Amun : KBC Centre Church, Langol, Gambih No. 1.

Resource Person : Rev. Dino L. Touthang

BQ 2017 THUA HETSAHNA

Application Form:

Gambih/Gamkai jousea BQ 2017 Form hi March lhasunga kihin thot pan ding ahitai. Koi hijongleh adeijouse/apang nomjousen Gamkai/

Gambih sunga Youth lamkai ho/akinganse lamkai ho tohi kijatmat a form chu Dangka 20/- pehi a kilah thei ahi.

BQ 2017 Exam Nikhoding: BQ 2017 hi kumseh leh October lhasunga Sunday khatpen pen a kibol jing ahitoh lhon in tukum jong chutima a October langleh hungkibol kitding ahi. Anikho chetvang oljepleh hetsahna hung kineikit ding ahi.

BQ 2017 Portion: Tukum BQ a dingin Thuhilpa le Isaiah buteni akilheng in hijeh chun muntin a BQ a pangding jousen nasimpan utoh kilhon a lunglut tah a isimjing diuva jong ngehna iki-



nei uve. Kumdang a bangin bung tampi ahitah loujeh in veitampi simchai thei ahi.

BQ 2017 Prize ding: Tukum BQ prize dinghy, First: Dk. 10000/- Memento, Certificate, Second: Dk. 5000/- plus Memento, Certificate, Third: Dk. 3000/- Memento, Certificate. Chule mi 10 Consolation prize hi Wall Clock kipeding ahi.

Muntin'a Nulepa Pilepu tukum BQ a pangchek dingin temna sangpen ikinei uve.

UCPI NATIONAL MEETING

United Christian Prayer for India tohgonna noija achesa nisim 21-25 sunga Hyderabad mun'a National Meeting/Conference kin loupitah ana umin hiche kingon na chun KBC thalhengin Rev. Kamboi Chongloi, Men Secretary le Pastor Satminlen Khongsai, Youth Secretary ana kalsong lhon in ahi.

Hiche kiloikhomna hi hetthei dingpen in Mission Movement ahin chule adoi ule atup u chu India pumpi Christian pumna dinga kitho khomchek ding ti ahi. Hichea lamkai cheng in agelthupi pen uleh mipite atilkhouna chu ahileh India pumpi sunga State jousea District jouse a jong Christian jat akholdoh uva Christian lhasamdan tampi vetsahna jong anei uvin ahi.

India sunga houle bih kikhenna ho pailhah a mission a kiloikhom a kitho khom ding hatah a mission natoh a akikitho khom louleh India population khangtouva Christian population khangtalou hi boina lentah hunghiding ahitah dan jong tahlangna anei uvin ahi.

Lamkai chengin kiphal tah in anei sumlepai houjong itcha louhellin pan alauvin hiche kingon a lutjouse chu amaho kiphalna jalla 1.5 crore lutna kingon chu ana chenlhan ahi. Hiche kingon a chun houthu a kiloikhomna hoa lamkai ho bou pang ahin mi 1250 ana kikhomdoh in ahi.

India sunga mission natoh achalna din taojing ute. Chuleh UCPI tohgon jong molso ahina dingin lamkai ho dingle state jousea mopohna chang lamakai ho dingin jong taojing ute. Taona toh Natoh a Pathen na tohdng hi UCPI thupi ahijeh in taojing utin anatong dingin jong vaikon jing ute.

CHRISTIAN EDUCATION BOARD

HETSAH

2016-17 adia Theological Students Scholarship(Final Years) applied anabol ho, 64th KBC Assembly 2017 (C/C New Lambun-lane) in phatsah pehna apehho cheng, ahung lhung ding March 28(Wednesday) ni 11:30am tah leh KBC Office Chapel hall a thakhat tah'a hopdohpehna kin man dingin Board in phat sahna akineijin, achang dingho ama satah a apantheilou diuleh a Insung mi khat akhel a ahinsoltheidiu, Christian Edn Board Secy.pu (Rev Onthang Haokip, Ph.no. 7005268953/9862829818) ahin hetsah ma- sah-uva, ahung lah pehdiuvin hetsah ahi. Koitobang phat kitep nikho a hungpang lou aumkhah leh avel'a Prog. kigonpeh thei talou ding ahi tia kahin hetsah-masah u ahi. Kaki pah e.

Rev Onthang Haokip
Secy. CEB(KBC)



Achesa nisim 1st March 2017 chun L Jangnomphai KBC No.7 Khopi Maicham kin loupitah chu akineijin ahi. Speaker in Rev. Lamkeng Lhouvum KBC No.7 Pastor pa apangin ahi. Haosaho mopoh na noija Maicham kin chu ana chelhan ahi. Molchung lama akikal doh in Kho le veng Houbung dingin Chuleh Manipur General Election Thisan naisan long louva chamdel a ache lhah thei na dingin jong Taona akimangin, Pu Nehminlen Haokip Haosapu jong Mitlhi longpumin kho le veng din taona aneijin ahi. Pathen in L Jangnomphai Khosung phat thei boh jing taken.

Pu Hemgin Haokip, Head Deacon.

H. Lhangcham Baptist Church

KBC Gambih 15 Hou inn Thenso Hita



KBC No 15 hopsunga um H.lhangcham houinn chu Pakai tha-hat najallin DT.12 Feb 2017 ni Chun gambih sunga houbung jouse toh thenso ahitai.

Pakai phatthei boh na jallin Ningkum February 14, 2016 nichun houbung KBC adia lahlut ahitolhon in, Pathen Mapui naleh Panpi na jallin kumkhat jong lutlou in Pontho Tah in houbung Mi in Pathen tha hatna songin February 12, 2017 nichun Gambih Pastor Henkhomang Tuboi in Pa Pathen Chapa Pathen chuleh Lhagao theng Pathen min in Houinn chu lhandoh na ana neitai. Hou inn kithenso nia speaker a ihung panpeh uva Rev..Thangsath Kipgen chungleh Kithopina hinpea Langgol centre church ho chung a jong kipana Thu kahin phong e. KBC gambih 15 sunga Houbung mite jouse kithopina kachan jallun Kipa Thu kahin seiye. Pathen in H.Lhangcham houbung jong phatthei na phung vuh intin, KBC jong phatthei boh Jing taken. Kakipah e.

Keima,
Letpao
Head Deacon
H. Lhangcham Baptist church

SL. ZOUGAM HOUBUNG LAHLUTNA.

SL.Zougam kho hi Pu, Hemkhojang Haokip Haosat na ahin, chule Methodist Houbunga ana um ahiuvin, Kuki Baptist Convention kiloikhom na noiya um ding lunggel ahin nei'u toh kilhon in Office lang toh kijah matna ana um in, kinoptona dungjujin 19th February 2017 (Sunday) nin Gambih Pastor pa leh Gambih Lamkai ho chule gamsung Houbung mite ho pan nan General Secretary, KBC, in Pa, Pathen Chapa Pathen Chule Lhagao theng Pathen min in lahlut na leh phondohna ana neitan ahi.

Amahohi Gambih N0.20, hopsunga um ahi'u toh kilhon na tua kipatna Gambih N0.20, kivai hom na a pang ding ahiuvin, chule Houbung mite hohi mipha, milungtheng, Pathen lam'a gunchu tah ahiuvin, kipapi umtah ahiuve. In hi 15 bou ahiuvin, Houbung member jat hi mi 74 ahiuve. Houbung lhingset ahung hi theina diuvin taonan geldoh jing'utin, chule Pathen mapuina achan jing theina dingun leh tahsa Lhagaova ahung khantou jing theina dingun Pathen in phat thei boh jing tao-hen.

Pastor Mangboi Kipgen

Pastor Gambih No.20

KBC Thuso lahman kal ta

64th KBC General Assembly kiphatsah na dungjui jin KBC Thuso lahman chu neokhat ahungki khansah tai, hijeh chu muntin a KBC Thuso simjousen ina hetthem diuvin hetsah-na ahung kineije.



**Houbung
Individual
Post a**

**Rs. 300/-
Rs. 200/-
Rs. 250/-**

Rev. Yangthong Haokip ana mollem ta



Ngailut umtah (L) Rev. Yangthong Haokip hi phat sottah damlou jeh a kijen damdoh jou talouvin, achenna khomun Bethany a nisim 28th December, 2016 (Wednesday) jingkah langin angailut ainsung mite, khosungle Houbung sung mite dalhan pa kom'a choldo din anache masatai.

Amahin 1977-78 sungin Singapore a Trinity Theological College a Master f inistry Course agachaijin 1980 kumin KBC a Mission Secretary din join anabol in, hinlah 1992 kumin voluntary pension ana kilah tan ahi.

Amahi lekha them tah le lekha jih them tah khat ahin, aman eidalhah uhi KBC a dinga jong manna lentah ahi. Aman adalhah insung mite din taopeh ute.



*Lydia Resource Centre Supervisor Office Dedication pu
Rev. Dr. P. Chongloi Pastor Tuibong Centre Church in 15 Feb. 2017 nikhoo aneina*



*KBC Head Quarter Fellowship
an ngol taona Bethel
Prayer Mount mun a 25
February 2017 nikhoo
kineina*



Post Regd. MNP/81
Regd No. 18134/88



25th Feb Gambih 15 men Dept Seminar at Moreh BC

KBCTHUSO
March 2017
2017

If undelivered, please return to
The Editor, KBCThuso
KUKI BAPTIST CONVENTION
Opp. DM College, Imphal - 795 001
Contact: 9862633173